

MALAYSIA

DEWAN RAKYAT

ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 22 OKTOBER 2009, PUKUL 10.00 PAGI

Bil. 38

PERTANYAAN-PERTANYAAN BAGI JAWAB LISAN

1. PR-1223-L33724
Tan Sri Dato' Seri Ong Ka Ting [Kulai] minta **MENTERI PERDAGANGAN ANTARABANGSA DAN INDUSTRI** menyatakan adakah MITI sedang berusaha untuk menarik pelaburan asing yang boleh membantu negara kita menjadi sebuah negara yang merupakan "outsourcing center" dalam bidang penggunaan IT, sebagai contoh dalam proses pemprosesan data dan "data entry" selain daripada tertumpu kepada sektor perkilangan konvensional.
2. PR-1223-L33738
Tuan Saifuddin Nasution bin Ismail [Machang] minta **MENTERI PENERANGAN, KOMUNIKASI DAN KEBUDAYAAN** menyatakan apakah status kemajuan perluasan perkhidmatan (roll out) Jaringan Internet Jalur Lebar Berkelajuan Tinggi (HSBB) yang dijalankan oleh Telekom Malaysia dan apa pula status peranan Jalur Lebar Nasional Sdn. Bhd. dalam projek ini
3. PR-1223-L33066
Dato' Seri Tengku Azlan Ibni Almarhum Sultan Abu Bakar [Jerantut] minta **MENTERI PERTAHANAN** menyatakan apakah rasionalnya kita memiliki kapal selam ini dan adakah kapal selam yang kita peroleh ini sama taraf dengan apa yang dimiliki oleh negara jiran kita di Singapura.
4. PR-1223-L34175
Puan Nurul Izzah Binti Anwar [Lembah Pantai] minta **MENTERI TENAGA, TEKNOLOGI HIJAU DAN AIR** menyatakan berdasarkan kemungkinan penggunaan sumber tenaga nuklear di Malaysia sebagai sumber baru dalam penjanaan elektrik menjelang 2025:-
 - (a) sudahkah Kerajaan meneliti sebab-sebab berlakunya krisis pengurangan sumber tenaga asli termasuk pengurusan sumber tenaga yang tidak efisien; dan

- (b) apakah langkah-langkah persediaan yang telah diambil oleh Kementerian untuk memastikan negara bersedia dalam penggunaan tenaga nuklear.
5. PR-1223-L33614
Ir. Haji Hamim Bin Samuri [Ledang] minta **MENTERI PELAJARAN** menyatakan adakah Kementerian bercadang mengkaji semula hadiah dan insentif untuk penerima Anugerah Sasterawan Negara bagi mengangkat martabat sastera negara.
6. PR-1223-L34543
Tuan Nga Kor Ming [Taiping] minta **MENTERI KEWANGAN** menyatakan sebab-sebab terperinci mengapa 4 syarikat diberi status monopoli merangkul kontrak pemasangan lampu di jalan dan bangunan semua jabatan serta badan berkanun Kerajaan dan apakah nilai kontrak yang telah diberi.
7. PR-1223-L33164
Tuan Teng Boon Soon [Tebrau] minta **MENTERI PERTANIAN DAN INDUSTRI ASAS TANI** menyatakan mengapa nelayan-nelayan tidak dibenarkan mengupah pekerja-pekerja asing. Apakah langkah-langkah Kementerian untuk membantu meningkatkan pembangunan industri perikanan.
8. PR-1223-L34040
Tuan Jeff Ooi Chuan Aun [Jelutong] minta **MENTERI LUAR NEGERI** menyatakan apakah kedudukan Malaysia sebagai pendorong utama dalam ASEAN akan terjejas memandangkan Indonesia telah berjaya menganggotai kumpulan G20 dan ia lebih giat memajukan agenda ekonomi antarabangsa dan tidak lagi tertumpu pada agenda ekonomi serantau.
9. PR-1223-L34824
Dato' Paduka Abu Bakar Bin Taib [Langkawi] minta **MENTERI KEWANGAN** menyatakan :-
- (a) bilangan kad kredit yang telah dikeluarkan oleh bank-bank konvensional dan Perbankan Islam; dan
- (b) dengan trend yang sebegini sekarang, adakah ianya di tahap yang membimbangkan dengan keadaan ekonomi negara sekarang.
10. PR-1223-T34393
Tuan Amran bin Ab Ghani [Tanah Merah] minta **MENTERI BELIA DAN SUKAN** menyatakan :-
- (a) berapakah jumlah peruntukan yang disediakan Kementerian bagi setiap kelab atau persatuan belia atau sukan (yang berdaftar di bawah Kementerian) setiap tahun; dan

- (b) apakah Kementerian menjangkakan jumlah munasabah dan mencukupi.
11. PR-1223-L33180
Tuan Masir Anak Kujat [Sri Aman] minta **MENTERI PELAJARAN** menyatakan sama ada peruntukan khas disediakan untuk membaik pulih SMK Balai Ringin, SMK Simanggang dan SMK Melugu di kawasan Parlimen Sri Aman dalam RMK-9 dan RMK-10.
12. PR-1223-L33867
Dr. Che Rosli bin Che Mat [Hulu Langat] minta **MENTERI PERUSAHAAN PERLADANGAN DAN KOMODITI** menyatakan status perkembangan tanaman alternatif seperti kenaf.
13. PR-1223-L33544
Dato' Seri Tiong King Sing [Bintulu] minta **MENTERI DALAM NEGERI** menyatakan :-
- (a) adakah pihak Kementerian berhasrat untuk mengeluarkan semula Kad Pengenalan Hijau kepada penduduk negeri Sarawak dalam masa terdekat ini; dan
- (b) berapakah jumlah penduduk negeri Sarawak yang mempunyai Sijil Kelahiran tetapi tiada MyKad (Status Kewarganegaraan belum ditentukan) dan yang telah memohon tetapi belum mendapat kelulusan / jawapan daripada pihak Kementerian.
14. PR-1223-L33707
Tuan Haji Ahmad bin Kasim [Kuala Kedah] minta **MENTERI PERTANIAN DAN INDUSTRI ASAS TANI** menyatakan apakah rancangan Kementerian untuk mengatasi masalah lambakan dan lebihan buah-buahan tempatan khususnya buah rambutan pada musim tertentu yang menyebabkan harga di pasaran terlalu rendah.
15. PR-1223-L34403
Dato' Haji Abd Rahman bin Dahlan [Kota Belud] minta **MENTERI KEMAJUAN LUAR BANDAR DAN WILAYAH** menyatakan apakah tindakan Kementerian dalam Bajet 2010 untuk menangani masalah bekalan air bersih di Kota Belud yang sudah berlanjutan sejak merdeka lagi.
16. PR-1223-L33436
Tuan Kulasegaran A/L Murugeson [Ipoh Barat] minta **MENTERI DALAM NEGERI** menyatakan :-
- (a) adakah Kerajaan bersiap sedia untuk menghapuskan Akta Keselamatan Dalam Negeri (ISA) yang serius ini. Jika tidak kenapa; dan

- (b) berapakah bilangan tahanan ISA yang masih di dalam kem tahanan.
17. PR-1223-L34636
Tuan Hasbi bin Habibollah [Limbang] minta **MENTERI DALAM NEGERI** menyatakan mengapakah daerah Limbang masih dijadikan tempat pembuangan daerah untuk pesalah/penjenayah sedangkan perkara ini mendapat bantahan dari rakyat di kawasan itu kerana secara tidak disedari pesalah/penjenayah ini boleh mempengaruhi belia-belia dan remaja tempatan dan juga mungkin membuka rangkaian baru jenayah.
18. PR-1223-L34125
Tuan Er Teck Hwa [Bakri] minta **MENTERI SUMBER ASLI DAN ALAM SEKITAR** menyatakan :-
- (a) adakah Kementerian bersetuju dengan 11 tuntutan yang dikemukakan oleh Jawatankuasa Anti-Cyanide Dalam Perlombongan Emas di Bukit Koman, Raub. Jika ya, apakah tindakan yang akan diambil. Jika tidak, mengapa; dan
- (b) jelaskan piawaian yang digunakan untuk penyingkiran alat ujian kimia yang dipasang tidak sampai enam hari.
19. PR-1223-L34133
Tuan Mohd Nizar bin Zakaria [Parit] minta **MENTERI KEWANGAN** menyatakan status pertumbuhan negara selepas krisis ekonomi baru-baru ini dan adakah ekonomi negara masih berada dalam keadaan stabil dan kukuh.
20. PR-1223-L34562
Puan Teo Nie Ching [Serdang] minta **PERDANA MENTERI** menyatakan identiti syarikat dan syarikat "public relation" tempatan dan luar negara yang diupah untuk mempromosikan konsep 1MALAYSIA dan YAB. Perdana Menteri di arena antarabangsa, jumlah wang yang telah dibelanjakan dan jumlah wang yang diperuntukkan untuk tujuan ini.
21. PR-1223-L34224
Dr. Tan Seng Giaw [Kepong] minta **MENTERI PENGAJIAN TINGGI** menyatakan kualiti pendidikan dan penarafan dunia IPTA dan IPTS di negara ini dan usaha serta keberkesanan untuk menjadikan hub pendidikan antarabangsa.
22. PR-1223-L33122
Dato' Mohd Jidin bin Shafee [Setiu] minta **MENTERI DALAM NEGERI** menyatakan jumlah kes kehilangan MyKad dan passport sejak tahun 2004 hingga kini mengikut pecahan tahun dan negeri serta kesannya terhadap keselamatan negara.

23. PR-1223-L34354
Tuan Liang Teck Meng [Simpang Renggam] minta **MENTERI KEWANGAN** menyatakan garis panduan dan dasar Kerajaan mengenai cukai import set dan komponen sistem tenaga solar bagi menggalakkan penggunaan tenaga solar dalam negeri. Adakah insentif masa ini mencukupi bagi menggalakkan orang ramai menggunakan tenaga solar.
24. PR-1223-L34652
Datuk Nur Jazlan Bin Mohamed [Pulai] minta **PERDANA MENTERI** menyatakan pelaksanaan Key Performance Index (KPI) kepada Menteri dan pegawai Kerajaan dan nyatakan sama ada KPI ini akan dilaporkan kepada umum dan apakah tindakan yang akan diambil kepada mereka yang gagal.
25. PR-1223-L34890
Dato' Noraini binti Ahmad [Parit Sulong] minta **MENTERI KEMAJUAN LUAR BANDAR DAN WILAYAH** menyatakan berapa peratus kawasan luar bandar di negara ini yang belum mendapat liputan bekalan air dan berapa peratus yang belum mendapat liputan bekalan elektrik. Bilakah sasaran 100 peratus untuk bekalan elektrik dan air untuk seluruh negara dapat dilaksanakan sepenuhnya.
26. PR-1223-L34512
Tuan Liew Chin Tong [Bukit Bendera] minta **MENTERI PERTAHANAN** menyatakan memandangkan Laporan Tahunan KEMENTERIAH mempunyai pelbagai isi yang agak sama dengan isi kandungan Kertas Putih Pertahanan negeri-negeri lain, adakah Kementerian mengkaji cadangan menambahkan isi kandungan Laporan Tahunan Kementerian supaya ditingkatkan menjadi Kertas Putih Pertahanan.
27. PR-1223-L33616
Tuan Zulkifli bin Noordin [Kulim Bandar Baru] minta **MENTERI KERJA RAYA** menyatakan :-
- (a) pecahan jumlah pekerja kutipan tol berdasarkan jantina/umur di konsesi lebuhraya dan adakah Kerajaan bercadang mengarahkan pemegang konsesi tol tidak membenarkan pekerja wanita bekerja antara jam 7 petang hingga 7 pagi; dan
 - (b) mengapa Kementerian tidak mengarahkan syarikat pemegang konsesi tol dan lebuhraya supaya mengambil golongan OKU sebagai pekerja kutipan tol.
28. PR-1223-L34298
Dato' Ngeh Koo Ham [Beruas] minta **PERDANA MENTERI** menyatakan sama ada Kerajaan bercadang untuk tidak membenarkan wakil-wakil rakyat melompat ke parti politik yang lain.

29. PR-1223-L33497
Tuan Alexander Nanta Linggi [Kapit] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada laporan tentang pengabaian hak asasi masyarakat Penan di Sarawak adalah betul atau tidak. Sekiranya ia betul, apakah langkah-langkah yang telah, sedang dan akan diambil untuk membantu masyarakat tersebut.
30. PR-1223-L34045
Dato' Kamarul Baharin bin Abbas [Telok Kemang] minta **MENTERI PERTAHANAN** menyatakan rasional dan sebab mengapa Kerajaan tidak melaksanakan Service Life Extension Program (SLEP) ke atas helikopter SIKORSKY S61 sepertimana dilakukan tentera Amerika Syarikat yang telah ditingkatkan untuk keupayaannya 20 ke 30 tahun dengan harga tidak melebihi RM30 juta seunit.
31. PR-1223-L34199
Tuan Muhammad bin Husain [Pasir Puteh] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah pihak Kementerian telah membuat kajian yang mendalam terhadap penggunaan RON95 di terutamanya kesan terhadap enjin kenderaan.
32. PR-1223-L34507
Dr. Haji Dzulkefly bin Ahmad [Kuala Selangor] minta **PERDANA MENTERI** menyatakan langkah konkrit yang telah dilaksanakan bagi memenuhi peruntukan Akta SPK. Apakah Kerajaan bersedia membentangkan Kertas Putih untuk menjelaskan pelaksanaan terkini dan kedudukan peruntukan akta tersebut.
33. PR-1223-L34844
Tuan Lim Kit Siang [Ipoh Timur] minta **MENTERI PERDAGANGAN ANTARABANGSA DAN INDUSTRI** menyatakan apakah langkah-langkah pemulihan yang diambil berikutan kejatuhan Malaysia sebanyak tiga aras dalam laporan Daya-saing Global oleh World Economic Forum, terutamanya di dalam bidang utama daya-saing Malaysia yang semakin merosot.
34. PR-1223-L34959
Dr. Haji Mohd Hayati Bin Othman [Pendang] minta **MENTERI DALAM NEGERI** menyatakan apakah jumlah indeks jenayah bagi seluruh negara mengikut negeri-negeri sejak tahun 2005 hingga kini.
35. PR-1223-L33814
Dato' Seri Ong Ka Chuan [Tanjong Malim] minta **MENTERI PERDAGANGAN ANTARABANGSA DAN INDUSTRI** menyatakan usaha yang telah diambil untuk meningkatkan penggunaan teknologi hijau dalam industri automotif negara. Apakah hala tuju Dasar Automotif Negara terutama sekali dalam penggunaan tenaga diperbaharui (renewable energy) dalam kenderaan buatan tempatan.

36. PR-1223-L33418
Puan Hajah Nancy binti Haji Shukri [Batang Sadong] minta **MENTERI KEWANGAN** menyatakan berapakah jumlah peruntukan di bawah Pakej Rangsangan Ekonomi telah dibelanjakan dan berapa peratus daripadanya untuk Pakej di negeri Sarawak.
37. PR-1223-L33078
Datuk Eric Enchin Majimbun [Sepanggar] minta **PERDANA MENTERI** menyatakan bilangan banci penduduk bagi seluruh Malaysia khususnya Sabah dan Sarawak pada tahun 1960, 1970, 1980, 1990, 2000 dan ramalan bagi tahun 2010. Apa rancangan Kementerian agar dapat menampung sara hidup setiap rakyat.
38. PR-1223-L34295
Dato' Ngeh Koo Ham [Beruas] minta **PERDANA MENTERI** menyatakan sama ada Kerajaan bercadang membuat pindaan kepada undang-undang untuk menjelaskan siapakah yang berhak menentukan kekosongan kerusi dalam Dewan Rakyat dan Dewan Negeri kerana kekeliruan sudah timbul akibat keputusan Mahkamah Persekutuan pada 8/6/2009 dalam kes Notis Usul No. 06-3-2009(A) Jamaluddin bin Mohd Radzi dan dua lagi V. Sivakumar a/l Varatharaju yang bercanggah dengan Perkara XXXII Bahagian Pertama Undang-undang Tubuh Kerajaan Negeri Perak.
39. PR-1223-L33769
Tuan Chua Tee Yong [Labis] minta **MENTERI KEWANGAN** menyatakan prestasi kewangan Syarikat Rapid KL dan KTMB dari tahun 2004 sehingga bulan Mei 2009 dan subsidi yang diberikan oleh Kementerian bagi membiayai operasi kedua-dua syarikat tersebut.
40. PR-1223-L34656
Puan Chong Eng [Bukit Mertajam] minta **MENTERI PERTAHANAN** menyatakan mengapa aset tentera seperti Bahagian Perkhidmatan Kesihatan digunakan semasa PRK Permatang Pasir. Perkhidmatan BPK adalah untuk tentera dan bukan untuk politik meraih undi. Nyatakan secara terperinci bilangan kakitangan dan kos penggunaan mekanisme Kementerian semasa PRK Permatang Pasir.

ATURAN URUSAN MESYUARAT DAN USUL-USUL

1. (D.R.22/2009) Rang Undang-undang Panglima Gagah Berani (Elaun Kenangan) (Pindaan) 2009 - **Menyambung semula Perbahasan atas masalah “Bahawa Rang Undang-undang ini dibacakan kali yang kedua sekarang (21 Oktober 2009)”**.

(Perdana Menteri)
2. (D.R. 30/2008) Rang Undang-undang Jawatankuasa Etika Hakim 2008. **Bacaan Kali Yang Kedua**

(Perdana Menteri)
3. (D.R. 24/2009) Rang Undang-undang Lembaga Perkhidmatan Kewangan Luar Pesisir Labuan (Pindaan) 2009. “

(Kementerian Kewangan)
4. (D.R. 25/2009) Rang Undang-undang Cukai Aktiviti Perniagaan Luar Pesisir Labuan (Pindaan) 2009. “

(Kementerian Kewangan)
5. (D.R. 30/2009) Rang Undang-undang Perkhidmatan Kewangan dan Sekuriti Labuan 2009. “

(Kementerian Kewangan)
6. (D.R. 31/2009) Rang Undang-undang Perkhidmatan Kewangan dan Sekuriti Islam Labuan 2009. “

(Kementerian Kewangan)
7. (D.R. 29/2009) Rang Undang-undang Syarikat Luar Pesisir (Pindaan) 2009. “

(Kementerian Kewangan)
8. (D.R. 27/2009) Rang Undang-undang Amanah Luar Pesisir Labuan (Pindaan) 2009. “

(Kementerian Kewangan)

9. (D.R. 26/2009) Rang Undang-undang Yayasan Labuan 2009. “
(Kementerian Kewangan)
10. (D.R. 23/2009) Rang Undang-undang Perkongsian Terhadap dan Perkongsian Liabiliti Terhadap Labuan 2009. “
(Kementerian Kewangan)
11. (D.R. 28/2009) Rang Undang-undang Suruhanjaya Sekuriti (Pindaan) 2009. “
(Kementerian Kewangan)
12. (D.R. 14/2009) Rang Undang-undang Pasaran Modal dan Perkhidmatan (Pindaan) 2009. “
(Kementerian Kewangan)
13. **Menteri Dalam Negeri** akan mencadangkan:-
 "Bahawa Majlis ini membuat resolusi menurut subseksyen (4) Seksyen 1, Akta Dadah Berbahaya (Langkah-Langkah Pencegahan Khas) 1985 supaya akta ini hendaklah terus berkuat kuasa bagi tempoh 5 tahun lagi mulai 15 Jun 2010".
14. PR-1223-U33693
Datuk Dr. Marcus Mojigoh [Putatan] akan mencadangkan:-
 "Bahawa Dewan ini mengambil maklum bahawa walaupun peratusan pengundi yang keluar mengundi pada setiap kali diadakan pilihan raya sama ada pilihan raya kecil ataupun pilihan raya umum, peratusan ini masih boleh ditingkatkan lagi. Ini berdasarkan dengan kajian yang telah dibuat di luar negara kerana kebanyakan rakyat tidak keluar mengundi disebabkan kekangan masa atau *time constraints*. Dan mengambil maklum bahawa dengan kemajuan teknologi, negara hendaklah memanfaatkan kemajuan ini ke peringkat maksimum yakni dengan memperkenalkan e-undi atau pun mengundi secara *online*. Penggunaan ICT juga boleh mengurangkan penyelewengan ataupun manipulasi seperti yang didakwa oleh pihak tertentu. Ini dapat diatasi dengan sistem ICT yang mengutamakan ciri keselamatan seperti penggunaan cap jari elektronik, bio-metrik dan pengimbas iris mata. Dan mengambil maklum bahawa selain daripada ciri keselamatan, e-undi juga boleh membenarkan rakyat mengundi dari mana-mana pelosok dunia ini sama ada dari pejabat, rumah dan lain-lain tempat tanpa hadir secara fizikal di pusat pengundian, di mana beliau didaftar sebagai pemilih. Ini tentu sekali akan dapat mengurangkan kos bagi pemilih tersebut.

Bagi pihak Kerajaan pula, pihak Suruhanjaya Pilihan raya akan dapat mengurangkan kos dari segi cetakan kertas undi dan sebagainya selain dapat menjalankan pemilihan yang lebih efisien dan telus. Maka dengan ini Dewan hendaklah mengambil ketetapan untuk meminta Kerajaan untuk melaksanakan e-undi bagi pilihan raya yang akan datang”.

(Perdana Menteri)

15. PR-1223-U33694

Datuk Dr. Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa toleransi kaum dan agama masih rendah di kalangan rakyat di negara ini. Perbuatan seperti caci mencaci, ekspresi muka, bahasa isyarat dan memandang rendah seseorang masih berleluasa di kalangan segelintir masyarakat terutama sekali di kalangan mereka yang tidak seagama, sebangsa, secerdik dan sekedudukan dengan mereka. Dan mengambil maklum bahawa ketegangan kaum dan agama juga kian menebal di negara ini disebabkan oleh ketidakpuasan hati sesetengah kaum atau penganut agama ke atas layanan yang diterima. Maka dengan ini Dewan hendaklah mengambil ketetapan untuk meminta Kerajaan untuk menubuhkan satu jawatankuasa khas (Task Force) atau Inter-faith Committee bagi menangani masalah ini. Keanggotaan Task Force ini hendaklah diwakili oleh didominasi agama yang terdapat di negara ini, parti politik kerajaan dan bukan kerajaan”.

(Perdana Menteri)

16. PR-1223-U33698

Datuk Dr. Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa polarisasi kaum masih timbul di negara ini. Dan mengambil maklum bahawa masalah polarisasi ini berlaku kerana kekurangan pemahaman dan pergaulan antara kaum di negara ini dan ini berlaku kerana masyarakat kebanyakannya hidup berkelompok mengikut kaum mereka sendiri. Dan mengambil maklum bahawa sistem pendidikan negara boleh dan dapat memainkan peranan penting untuk mengatasi masalah ini. Ini boleh dilakukan melalui penerapan nilai-nilai murni 1Malaysia dalam sistem pendidikan negara bermula daripada peringkat pra-sekolah hinggalah ke peringkat universiti.

Sistem negara juga haruslah menggalakkan murid-murid untuk mengambil mata pelajaran bukan bahasa ibunda mereka supaya melalui pertuturan, mereka bukan sahaja dapat menguasai bahasa lain, mereka juga dapat memahami sensitiviti kaum lain melalui bahasa yang mereka pelajari. Selaras dengan slogan Kita berdiri, kita berfikir dan bertindak sebagai bangsa *Malaysia-One People* Sistem Pendidikan Negara dapat memainkan peranan penting dalam membentuk 1Malaysia. Maka dengan ini Dewan hendaklah mengambil ketetapan untuk meminta Kerajaan untuk menggubal satu Dasar Pendidikan Negara yang menekankan pembentukan rakyat Malaysia”.

(Menteri Pelajaran)

17. PR-1223-U33701

Datuk Dr. Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa masih terdapat ramai lagi rakyat Malaysia dari kalangan Orang Asli, Murut, Dusun dan *Indigenous People* yang masih bergantung kepada hasil dan sumber hutan untuk kehidupan harian mereka. Dan mengambil maklum bahawa kumpulan ini merupakan masyarakat yang terpinggir dari arus pembangunan dan hidup dalam keadaan serba kekurangan dan daif. Dan mengambil maklum bahawa kebanyakan program ataupun usaha Kerajaan untuk membawa pembangunan kepada semua rakyat Malaysia, tidak sampai kepada mereka disebabkan oleh beberapa faktor. Maka dengan ini Dewan hendaklah mengambil ketetapan untuk meminta Kerajaan untuk menubuhkan satu jawatankuasa khas (Task Force) bagi menangani masalah ini dengan kuasa spesifik untuk mempercepatkan penyerapan mereka ini dalam masyarakat negara ini, seperti dalam kawasan pembangunan koridor dan sebagainya”.

(Perdana Menteri)

18. PR-1223-U33714
Datuk Dr. Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kebanyakan sungai di negara ini telah dicemari dan sebilangan sungai telah pun dikategorikan sebagai sungai mati. Dan mengambil maklum bahawa kebanyakan sungai ini merupakan nadi kepada bekalan air mentah negara. Dan mengambil maklum bahawa pencemaran ini sering dilakukan oleh segelintir masyarakat yang tidak bertanggungjawab terutama sekali mereka yang tinggal di tebing sungai dan setinggian. Aktiviti komersial, seperti perladangan juga telah menambah pencemaran sungai kita. Aliran air tidak terawat daripada kawasan perumahan dan kedai komersial seperti restoran, telah memburukkan lagi keadaan ini. Agensi Kerajaan seperti hospital juga tidak ketinggalan dalam mencemarkan sungai kita. Kegiatan pembangunan seperti penimbusan tanah dan pembinaan yang tidak mengikut laporan EIA juga menyumbang kepada pencemaran ini. Dan mengambil maklum juga bahawa sekiranya tidak ada langkah drastik yang diambil bagi mengatasi masalah pencemaran sungai ini, air yang dialirkan oleh sungai kita akan memusnahkan hidupan akuatik negara dan sekali gus kita akan kehilangan pendapatan akuatik yang mana melibatkan golongan nelayan secara langsung dan kita sebagai pengguna secara tidak langsung. Maka dengan ini Dewan hendaklah mengambil ketetapan untuk meminta Kerajaan untuk menggubal satu Dasar Sungai Negara supaya semua sungai di negara ini diwartakan untuk dilindungi, sebagaimana sistem tagal di negeri Sabah, di mana semua orang ramai termasuklah NGO dipertanggungjawabkan untuk memulihara sungai tersebut".

(Menteri Sumber Asli Dan Alam Sekitar)

19. PR-1223-U34905
Dr. Tan Seng Giaw [Kepong] akan mencadangkan:-

"Bahawa Dewan ini membahaskan prestasi pelaksanaan Pelan Integriti Nasional. Bahawa Dewan juga hendak mendebatkan setakat mana amalan politik di negara ini berteraskan kepada integriti dan kebudayaan politik sihat, beretika dan demokratik".

(Perdana Menteri)

20. PR-1223-U34907
Dr. Tan Seng Giaw [Kepong] akan mencadangkan:-

"Bahawa Dewan ini mempertimbangkan implikasi dan konsekuensi perubahan iklim khasnya selepas Perhimpunan Bangsa-bangsa Bersatu mengenai perkara ini. Bahawa Dewan juga hendak mengetahui kesan-kesan perubahan iklim ke atas Malaysia dan langkah-langkah yang perlu diambil untuk mencapai '*Carbon Neutral*'.

(Menteri Sumber Asli Dan Alam Sekitar)

21. PR-1223-U34270
Puan Teresa Kok Suh Sim [Seputeh] akan mencadangkan:-

"Bahawa dewan ini mengambil keputusan untuk membenarkan siaran langsung sidang Dewan Rakyat melalui televisyen supaya rakyat boleh menonton ucapan para Ahli Yang Berhormat dan proses Dewan Rakyat membuat keputusan terhadap dasar dan undang-undang".

(Menteri Penerangan, Komunikasi dan Kebudayaan)

22. PR-1223-U34273
Puan Teresa Kok Suh Sim [Seputeh] akan mencadangkan:-

"Bahawa Dewan ini mengambil keputusan untuk memulihkan pilihan raya Kerajaan tempatan demi menjadikan perkhidmatan Kerajaan tempatan di negara kita lebih berkesan di samping memulangkan hak kepada rakyat untuk memilih Datuk Bandar dan Ahli Majlis Kerajaan Tempatan".

(Menteri Perumahan dan Kerajaan Tempatan)

23. PR-1223-U33090
Datuk Eric Enchin Majimbun [Sepanggar] akan mencadangkan:-

"Bahawa Dewan ini membincang dan menetapkan dalam apa jua urusan pentadbiran serta tata bahasa yang ada kaitan dengan pentadbiran Kerajaan Pusat atau Negeri supaya semua perjawatan dinyatakan dengan semua suku kaum dalam borang-borang pentadbiran haruslah juga dicatatkan kaum Bumiputera Sabah/Sarawak dengan catatan etnik-etnik bangsa yang berkenaan".

(Perdana Menteri)

24. PR-1223-U33093
Datuk Eric Enchin Majimbun [Sepanggar] akan mencadangkan:-

"Bahawa Dewan ini membincang dengan seriusnya mengenai status kedudukan atau menetapkan satu dasar/formula agar penyandang-penyandang jawatan dalam jabatan Kerajaan Persekutuan di setiap negeri seharusnya diberi keutamaan kepada orang tempatan serta sekurang-kurangnya lebih daripada separuh penjawat tersebut haruslah disandang oleh mereka dari negeri masing-masing untuk mengelakkan pembaziran elaun perumahan".

(Perdana Menteri)

25. PR-1223-U33096
Datuk Eric Enchin Majimbun [Sepanggar] akan mencadangkan:-

"Bahawa Dewan ini mengambil perhatian secara serius serta tindakan lanjut mengenai pendaftaran dokumen individu berkaitan dengan daftar kelahiran/lewat, daftar kad pengenalan serta daftar pengiktirafan kerakyatan khasnya di Sabah dan membentuk satu badan jawatankuasa khas dalam jabatan untuk meneliti dan menghalusi setiap permohonan serta pendaftaran bagi maksud sedemikian".

(Menteri Dalam Negeri)

26. PR-1223-U33097
Datuk Eric Enchin Majimbun [Sepanggar] akan mencadangkan:-

"Bahawa Dewan ini membincang dan menetapkan untuk mengukuhkan kestabilan dan kepercayaan rakyat terhadap Kerajaan agar Dakwat Kekal pada pilihan raya pada masa hadapan diguna pakai untuk mengelakkan keraguan, kebimbangan serta tidak percaya kepada Suruhanjaya Pilihan Raya serta penguatkuasaan undang-undang yang tidak meyakinkan diri terhadap pelaksanaan Dakwat Kekal tersebut seperti apa yang berlaku dalam Pilihan raya ke-12 di mana jutaan ringgit telah dibelanjakan tetapi kini menghampakan rakyat jelata".

(Perdana Menteri)

27. PR-1223-U34568
Tuan Fong Kui Lun [Bukit Bintang] akan mencadangkan:-

“Bahawa Dewan yang mulia ini meluluskan ketetapan bahawa Kerajaan Persekutuan hendaklah memulihkan semula pilihan raya Kerajaan Tempatan di semua Majlis / Dewan Bandaraya dan Majlis Perbandaran seluruh negara dengan mengambil tindakan meminda Perlembagaan Persekutuan dan Akta Kerajaan Tempatan bagi maksud tersebut supaya kuasa perwakilan rakyat di dalam Kerajaan tempatan dikembalikan semula selaras dengan amalan demokrasi berparlimen di Malaysia dan memenuhi tuntutan rakyat sebagaimana yang dijelmakan dalam keputusan Pilihan Raya Umum 2008 yang mencerminkan kehendak dan hasrat rakyat”.

(Perdana Menteri)

28. PR-1223-U34570
Tuan Fong Kui Lun [Bukit Bintang] akan mencadangkan:-

“Bahawa Dewan yang mulia ini bersetuju supaya Kerajaan Persekutuan membina sebuah Muzium Memorial Kapitan Yap Ah Loy bagi mengenang jasa mendiang sebagai pembuka Bapa Pembangunan Awal Kuala Lumpur untuk tatapan masyarakat Malaysia dan antarabangsa”.

(Menteri Penerangan, Komunikasi dan Kebudayaan)

29. PR-1223-U33446
Tuan Kulasegaran A/L Murugeson [Ipoh Barat] akan mencadangkan:-

"Bahawa Dewan ini mengarahkan Kerajaan untuk membina lebih banyak sekolah-sekolah Cina dan Tamil memandangkan peningkatan pelajar-pelajar ke sekolah ini”.

(Menteri Pelajaran)

30. PR-1223-U33447
Tuan Kulasegaran A/L Murugeson [Ipoh Barat] akan mencadangkan:-

"Bahawa Dewan ini mengarahkan mengambil satu ketetapan dan mendesak Kerajaan untuk menubuhkan dana pemberhentian (retrenchment fund) dengan serta merta”.

(Menteri Sumber Manusia)

31. PR-1223-U33448
Tuan Kulasegaran A/L Murugeson [Ipoh Barat] akan mencadangkan:-

"Bahawa Dewan ini mengarahkan Menteri Sumber Manusia mengkaji dan mengambil insentif untuk menghidupkan semula Akta South Indian Labour Fund yang telah dibubarkan pada tahun 1999".

(Menteri Sumber Manusia)

32. PR-1223-U33700
Dr. Michael Jeyakumar Devaraj [Sungai Siput] akan mencadangkan:-

"Bahawa, memandangkan- Rancangan pembinaan rumah pangsa telah dilaksanakan oleh Kerajaan Malaysia sebagai suatu kaedah utama dalam menangani masalah kekurangan rumah di Malaysia dan setakat ini beribu-ribu keluarga berpendapatan rendah dan sederhana sedang menduduki rumah-rumah pangsa dan rendah; dan- Sistem pengurusan banyak rumah pangsa kos rendah dan sederhana adalah amat kurang memuaskan. Antara sebab utamanya adalah ketidakupayaan badan pengurusan mengutip yuran pengurusan daripada semua pemilik unit; dan- Keadaan rumah-rumah pangsa yang tidak bersih dan dijaga dengan sempurna sedang menjejaskan keselamatan dan kesihatan beratus-ratus keluarga berpendapatan rendah di Malaysia; Dewan ini mengesyorkan suatu tempoh masa harus diperuntukkan untuk membincangkan cara-cara mengatasi masalah pengurusan rumah-rumah pangsa termasuk:-1. Penubuhan suatu agensi khas untuk memantau pengurusan rumah-rumah pangsa kos rendah dan sederhana di Malaysia.2. Mewajibkan Majlis Perbandaran mengambil alih pengurusan rumah-rumah pangsa di kawasan Majlis itu yang tidak dijaga dengan betul.3. Memperuntukkan suatu dana khas yang mencukupi supaya membolehkan Majlis Perbandaran memulihkan rumah-rumah pangsa yang tidak diurus dengan sempurna.4. Pengutipan yuran pengurusan diambil alih oleh Majlis Perbandaran dengan menjadikannya sebahagian pada cukai taksiran dengan syarat cukai taksiran untuk seunit rumah pangsa tidak melebihi cukai taksiran untuk rumah-rumah kos rendah di bandar itu".

(Menteri Perumahan dan Kerajaan Tempatan)

33. PR-1223-U33704
Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan agar Kerajaan Persekutuan mengambil langkah segera untuk mengesahkan dan mengisytiharkan bahawa Malaysia bukan negara sekular seperti India sebaliknya sebuah negara yang mengamalkan dwi-sistem (sistem perundangan hybrid) iaitu dengan meminda Artikel 3 Perlembagaan Persekutuan dengan menambah perkataan seperti berikut (seperti yang dihitamkan): Islam adalah agama bagi Persekutuan termasuk dari segi undang-undang dan syariatnya." "Bahawa Dewan mengambil maklum bahawa keputusan mahkamah di dalam kes Che Omar Che Soh v. Pendakwa Raya dan Jamaluddin Osman v. Menteri Dalam Negeri telah banyak diputar belit dan disalah tafsir oleh golongan tertentu untuk memberi gambaran kononnya Malaysia adalah negara sekular sedangkan hakikatnya Malaysia bukanlah negara sekular sebaliknya negara yang meletakkan Islam sebagai agama bagi Persekutuan, maka dengan pindaan kepada Artikel 3 Perlembagaan Persekutuan seperti yang dicadangkan akan memperjelaskan perihal kedudukan status negara ini tanpa sebarang keraguan lagi".

(Perdana Menteri)

34. PR-1223-U33712
Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan agar Kerajaan Persekutuan mengambil langkah supaya Artikel 4 Perlembagaan Persekutuan dipinda dengan menambah perkataan seperti berikut (seperti yang dihitamkan) Perlembagaan ini adalah undang-undang utama Persekutuan dan, kecuali undang-undang dan syariat Islam, apa-apa undang-undang yang diluluskan berlawanan dengan Perlembagaan ini dan undang-undang Islam atau hukum syarak hendaklah terbatal setakat ianya berlawanan itu. Bahawa Dewan mengambil maklum bahawa banyak keadaan di mana hukum syarak' syariat Islam telah terbatal dan atau tidak dapat dilaksanakan kerana Artikel 4 Perlembagaan Persekutuan ini yang meletakkan undang-undang negara mengatasi semua undang-undang dan peraturan lain termasuk undang-undang serta syariat Islam seperti pengharaman pemakaian serban di sekolah-sekolah kebangsaan, pemakaian purdah dan jilbab di jabatan-jabatan kerajaan, pelaksanaan undang-undang syarak seperti khalwat, zina, qazaf yang bercanggah dengan hukum syarak dan lain-lain".

(Perdana Menteri)

35. PR-1223-U33748

Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan agar Kerajaan Persekutuan mengambil langkah supaya Artikel 11 (1) Perlembagaan Persekutuan dipinda dengan menambah perkataan seperti berikut (seperti yang dihitamkan) tiap-tiap orang adalah berhak menganuti dan mengamalkan agamanya, **termasuk menukar agamanya kecuali bagi penganut agama Islam yang hendaklah tertakluk kepada undang-undang dan syariat Islam. Bagi maksud penganut agama Islam, soal kemasukan dan kemurtadan dari agama Islam hendaklah ditentukan oleh Mahkamah Syariah yang mempunyai bidang kuasa mutlak ke atasnya.** Bahawa Dewan ini mengambil maklum bahawa walaupun Mahkamah Persekutuan di dalam beberapa kes termasuk Azlina Jailani @ Lina Joy v. Majlis Agama Islam Wilayah Persekutuan dan Jabatan Pendaftaran Negara memutuskan bahawa dalam hal ehwal dan permasalahan kemasukan atau kemurtadan daripada Islam hanya Mahkamah Syariah mempunyai bidang kuasa dan Mahkamah Sivil tidak boleh mempunyai apa-apa bidang kuasa menurut Artikel 121 (1A), namun masih lagi ada pihak yang mempertikaikan dan membawa kes seumpama ini ke Mahkamah Sivil di mana dalam kes terbaru melibatkan seorang Punjabi Muslim mayatnya terlantar di Hospital Sg. Buloh, Selangor selama sebulan kerana Mahkamah Sivil masih lagi mahu mendengar kes-kes seumpama ini, sedangkan merupakan fardu kifayah ke atas umat Islam untuk menyegerakan pengurusan dan pengebumian jenazah mana-mana orang Islam yang telah meninggal dunia. Dengan adanya peruntukkan seumpama di atas maka isu seperti ini tidak akan berbangkit lagi".

(Perdana Menteri)

36. PR-1223-U33767

Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan agar Kerajaan Persekutuan mengambil langkah supaya Jadual 9 Senarai 2(1) Perlembagaan Persekutuan dipinda dengan membuang perkataan seperti berikut: ‘...tetapi tidak mempunyai bidang kuasa mengenai kesalahan-kesalahan kecuali setakat yang diberi oleh undang-undang persekutuan...’ dan diganti dengan perkataan berikut; ‘dan mempunyai bidang kuasa mengenai apa-apa jua kesalahan jenayah syarie dan lain-lain yang ditetapkan atau diperuntukkan di dalam dan menurut hukum syarak’ dan undang Islam (termasuk hudud, qisas dan ta’zir) termasuk membicarakan, memutuskan dan menghukum mana-mana orang Islam yang berkenaan menurut sabitan dan hukuman yang ditetapkan oleh hukum syarak’ dan undang-undang Islam serta melaksana dan menguatkuasakan apa jua hukuman dan/atau perintah yang dikeluarkannya’. Dan proviso kepada Seksyen 2, Akta Mahkamah Syariah (Bidang kuasa Jenayah) 1965 (Akta 355) hendaklah dipinda bersesuaian dengan pindaan kepada Jadual 9 Senarai 2 (1) Perlembagaan Persekutuan seperti yang dinyatakan di atas dan hendaklah berbunyi seperti berikut: Mahkamah Syariah hendaklah mempunyai bidang kuasa mengenai apa-apa jua kesalahan jenayah syarie dan lain-lain yang ditetapkan atau diperuntukkan di dalam dan menurut hukum syarak’ dan undang-undang Islam (termasuk hudud, qisas dan ta’zir) termasuk membicarakan, memutuskan dan menghukum mana-mana orang Islam yang berkenaan menurut sabitan dan hukuman yang ditetapkan oleh hukum syarak’ dan undang-undang Islam serta melaksana dan menguatkuasakan apa jua hukuman dan/atau perintah yang dikeluarkan. Bahawa Dewan ini mengambil maklum umat Islam wajib melaksanakan syariat Islam termasuk undang-undang jenayahnya seperti hudud, qisas dan ta’zir tanpa sebarang pengubahsuaian dan pindaan seperti yang berlaku sekarang dan Dewan mengambil maklum bahawa kegagalan melaksanakan sistem perundangan Islam sepenuhnya ini akan boleh membatalkan aqidah umat Islam”.

(Perdana Menteri)

37. PR-1223-U33783
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan agar Kerajaan Persekutuan menguatkuasakan keputusan daripada muzakarah Majlis Fatwa Kebangsaan ke 19 pada 6hb-8hb Oktober 1987 dan mengambil langkah serta-merta memansuhkan dan menghapuskan semua amalan dan upacara bertafakur yang diadakan di hadapan Tugu Negara sempena Hari Pahlawan, Hari Angkatan Tentera, Hari Polis dan lain-lain hari peringatan atau apa juga upacara rasmi dan semua langkah yang berkesan dan efektif diambil agar anggota tentera, polis dan lain-lain orang yang beragama Islam tidak dipaksa dan/atau diarah melakukan upacara dan amalan kawad hormat dan/atau bertafakur di hadapan Tugu Negara yang telah difatwakan sebagai syirik”.

(Perdana Menteri)

38. PR-1223-U33785
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Kerajaan Persekutuan dengan kerjasama semua Kerajaan Negeri supaya melantik seorang Mufti Negara sebagai Ketua bagi dan dengan kuasa dan autoriti mengatasi kesemua mufti-mufti dan menjadi Pengerusi bagi Majlis Fatwa Kebangsaan dengan tanggungjawab dan menjawab hanya kepada Yang Di-Pertuan Agong dan Majlis Raja-raja. Selanjutnya Dewan ini mengambil ketetapan mendesak Kerajaan supaya memberi kuasa dan bidang kuasa jelas kepada Majlis Fatwa Kebangsaan untuk menguatkuasakan dan melaksanakan fatwa-fatwa yang dikeluarkannya dan mana-mana orang yang mempersoalkan dan/atau mempertikaikan fatwa-fatwa tersebut hendaklah dianggap tegas menurut Seksyen 298A Kanun Keseksaan atau di bawah mana-mana undang-undang (Persekutuan atau Negeri)”.

(Perdana Menteri)

39. PR-1223-U33794
Tuan Zulkifli bin Noordin [Kulim Bandar Baru] akan mencadangkan:-
- “Bahawa Dewan ini mengambil langkah untuk menubuhkan sebuah jawatankuasa caucus khusus untuk menangani dan memantau dan mengambil langkah-langkah berkaitan dengan masalah Palestin dan menamakan badan ini sebagai ‘Jawatankuasa Caucus bagi Palestin’ dengan melantik YB Kepala Batas sebagai Pengerusi Caucus tersebut dan selanjutnya Dewan ini mendesak rejim Zionis Israel supaya segera mengembalikan hak rakyat Palestin dan mengiktiraf Negara Islam Palestin sebagai negara yang merdeka dan berdaulat dan Baitulmuqaddis sebagai ibu negeri Negara Islam Palestin”.
- (Perdana Menteri)**
40. PR-1223-U33802
Tuan Zulkifli bin Noordin [Kulim Bandar Baru] akan mencadangkan:-
- “Bahawa Dewan ini mengambil langkah untuk menubuhkan sebuah jawatankuasa caucus khusus untuk menangani dan memantau dan mengambil langkah-langkah berkaitan dengan hal ehwal Islam dan umat Islam dalam negara sama ada di peringkat Persekutuan mahupun negeri dengan tujuan untuk memartabatkan, memperkukuhkan dan mempertahankan hal ehwal Islam dan hak-hak umat Islam dan menamakan badan ini sebagai ‘Jawatankuasa Caucus bagi Hal Ehwal Islam’ dengan melantik Y B Kepala Batas sebagai Pengerusi Caucus tersebut”.
- (Perdana Menteri)**
41. PR-1223-U33843
Tuan Zulkifli bin Noordin [Kulim Bandar Baru] akan mencadangkan:-
- "Bahawa Dewan ini mengambil langkah untuk menubuhkan sebuah jawatankuasa caucus khusus untuk menangani dan memantau dan mengambil langkah-langkah berkaitan dengan hal ehwal masyarakat India dengan tujuan untuk memantapkan kedudukan ekonomi mereka dan menyelesaikan permasalahan kewarganegaraan dan kad pengenalan mereka dan dinamakan sebagai Jawatankuasa Caucus bagi Hal Ehwal Masyarakat India”.
- (Menteri Dalam Negeri)**

42. PR-1223-U33845
Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan mendesak Kementerian Pelajaran supaya dengan serta merta menubuhkan sebuah Majlis Buku Negara dengan peruntukkan yang mencukupi dan segera menggubal Dasar Buku Negara dan Akta Buku serta mengambil semua langkah yang munasabah dan praktikal untuk membantu, menggalakkan, membangunkan dan memajukan industri buku negara. Selanjutnya Dewan juga membuat ketetapan supaya Dasar Buku Negara seperti yang telah termaktub segera dilaksanakan sepenuhnya dan mencapai matlamat yang disasarkan dalam Dasar Buku Negara tersebut".

(Menteri Pelajaran)

43. PR-1223-U33850
Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan mendesak Kerajaan Persekutuan supaya mengambil langkah menyiarkan dan mewajibkan siaran azan pada tiap-tiap waktu solat fardu yang lima di kesemua tempat awam tanpa sebarang sekatan dan/ atau halangan. Ini adalah kerana sebagai sebuah negara yang meletakkan Islam sebagai agama Persekutuan seperti yang dimaktubkan oleh Artikel 3 Perlembagaan Persekutuan, maka adalah penting untuk syiar Islam dimartabatkan".

(Perdana Menteri)

44. PR-1223-U33855
Tuan Zulkifli bin Noordin [Kulim Bandar Baru] akan mencadangkan:-

"Bahawa Dewan ini mengambil ketetapan mendesak Menteri Dalam Negeri mengambil langkah supaya kesemua banduan dan tahanan yang disabit dan dikenakan hukuman penjara sepanjang hayat hendaklah dikurangkan hukuman penjara tidak melebihi 20 (dua puluh tahun) dan bagi yang telah menjalani hukuman melebihi jumlah 20 tahun tersebut (setelah ditolak cuti dan kelakuan baik) hendaklah dibebaskan dengan serta-merta".

(Menteri Dalam Negeri)

45. PR-1223-U33976
Tuan Zulkifli bin Noordin [Kulim Bandar Baru] akan mencadangkan:-
- “Bahawa Dewan ini mengambil langkah mendesak Menteri Pengangkutan supaya mengarahkan dan/ atau mengenakan syarat kepada syarikat penerbangan Malaysia Airline, Air Asia atau mana-mana syarikat penerbangan dalam negeri ini supaya membenarkan kakitangan wanitanya terutama pramugari yang beragama Islam pilihan untuk memakai pakaian/ pakaian seragam yang mematuhi hukum syarak’ sebagaimana syarikat penerbangan antarabangsa lain seperti Emirates Airways, Saudi Airline, Royal Brunei Airline dan lain-lain”.
- (Menteri Pengangkutan)**
46. PR-1223-U33978
Tuan Zulkifli bin Noordin [Kulim Bandar Baru] akan mencadangkan:-
- “Bahawa Dewan ini mengambil ketetapan mendesak Menteri Pengangkutan melarang dan/ atau mengenakan syarat kepada syarikat Penerbangan Malaysia supaya menghentikan penjualan arak dan lain-lain minuman keras dan yang memabukkan semasa di dalam penerbangan sebagaimana yang telah pun dilaksanakan oleh banyak syarikat penerbangan antarabangsa lain seperti Saudi Air, Emirates Airways, Brunei Airline dan lain-lain”.
- (Menteri Pengangkutan)**
47. PR-1223-U33979
Tuan Zulkifli bin Noordin [Kulim Bandar Baru] akan mencadangkan:-
- “Bahawa Dewan ini mengambil ketetapan mendesak Menteri Perdagangan Dalam Negeri, Koperasi dan Kepenggunaan melarang dan/atau mengenakan syarat kepada syarikat perniagaan runcit Seven-Eleven (7-11), KK Mart dan lain-lain kedai serbaneka dilarang sama sekali daripada menjual arak dan/atau apa-apa minuman keras dan yang memabukkan serta sebarang bentuk kondom di premisnya. Dewan ini mengambil maklum banyak kes terjadi di mana remaja dan belia Melayu beragama Islam yang menyalahgunakan penjualan arak dan minuman beralkohol serta kemudahan kondom di kedai-kedai serbaneka ini untuk kegiatan tidak berakhlak dan bermoral”.
- (Menteri Perdagangan Dalam Negeri Koperasi dan Kepenggunaan)**

48. PR-1223-U33980

Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Menteri Dalam Negeri supaya dengan segera mengambil langkah membebaskan semua tahanan Akta Keselamatan Dalam Negeri yang ditahan kononnya atas dakwaan terlibat dengan kegiatan militan Islam seperti Kumpulan Mujahidin Malaysia (KMM), Jemaah Islam Malaysia (JI), Kumpulan Al-Maunah dan lain-lain termasuk Mas Selamat Kastari dan jika pihak Kerajaan mempunyai apa-apa bukti dan keterangan terhadap mereka hendaklah mereka dengan segera dibawa ke hadapan sebuah Mahkamah Sivil yang berbidang kuasa untuk membicarakan mereka tanpa sebarang kelengahan lagi. Bahawa Dewan ini mengambil maklum bahawa menahan mana-mana individu tanpa perbicaraan dan hak membela diri adalah bercanggah dengan hukum syarak’ dan undang-undang Islam, apatah lagi terdapat undang-undang lain yang mencukupi untuk menangani permasalahan perundangan yang ada bagi hal-hal yang menjejaskan keselamatan, keamanan dan ketenteraman negara ”.

(Menteri Dalam Negeri)

49. PR-1223-U33981

Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Menteri di Jabatan Perdana Menteri supaya mengkaji dan melaksanakan projek membesarkan dan membaik pulih Masjid Jamek Bandaraya Kuala Lumpur termasuk membina mihrab dan mimbar baru yang bersesuaian, menurap keseluruhan tapak Masjid tersebut dengan marmar sebagaimana yang di buat di Masjidil Haram dan Masjid Nabawi serta memperkukuhkan bumbung Masjid tersebut agar dapat menampung jemaah untuk mengerjakan solat terutamanya solat Jumaat dan kedua Aidilfitri & Aidiladha memandangkan pertambahan jemaah yang semakin meningkat mutakhir ini”.

(Perdana Menteri)

50. PR-1223-U33982
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Kementerian Dalam Negeri dan Kementerian Sumber Manusia supaya mengeluarkan larangan terhadap mana-mana pembantu rumah asing yang beragama Islam daripada bekerja dengan mana-mana majikan yang bukan beragama Islam. Ini adalah kerana terdapat banyak aduan pembantu-pembantu rumah asing yang beragama Islam yang dipaksa memakai pakaian bercanggah dengan Islam seperti berseluar pendek, memakan makanan dan minuman yang haram seperti babi dan arak, serta dipaksa memandikan dan membela anjing dan tinggal di persekitaran dan suasana yang jelas bercanggah dan/atau tidak bersesuaian dengan seorang Muslim”.

(Menteri Sumber Manusia)

51. PR-1223-U33984
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Kementerian Dalam Negeri supaya segera mengadakan siasatan terhadap kumpulan yang melabel diri mereka sebagai “Sisters in Islam” yang tidak berdaftar dengan Pendaftar Pertubuhan dan oleh itu terletak di luar bidang kuasa Pendaftar Pertubuhan tetapi sebaliknya dan yang sebenarnya adalah sebuah syarikat yang didaftarkan di bawah Suruhanjaya Syarikat Malaysia dengan nama SiS Forum Malaysia Sdn. Bhd. tetapi bergerak sebagai NGO yang aktivitiya dikhuatiri bertentangan dengan syariat Islam dan menyiasat bagaimana kumpulan ini dibenarkan melabel diri mereka dengan label “Islam” sedangkan nama pendaftarannya tidak tercatat sedemikian, dan sekiranya merujuk kumpulan ini serta anggota Lembaga Pengarah dan kumpulan pengurusannya ke Majlis Fatwa Kebangsaan dan mana-mana pihak berkuasa Islam untuk siasatan lanjut, dan selanjutnya Dewan ini mendesak Kementerian Dalam Negeri menyiasat sumber dana kumpulan ini yang menurut maklumat yang ada kumpulan ini mendapat bantuan dana dan pembiayaan antaranya daripada pertubuhan bukan Islam seperti Yayasan Rockefeller (sebuah yayasan Yahudi) daripada Amerika Syarikat dan Konrad Adreneur daripada German (sebuah yayasan yang dikuasai oleh Parti Kristian Demokrat German)”.

(Menteri Dalam Negeri)

52. PR-1223-U33985

Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mencadangkan kepada Kementerian Kewangan supaya membenarkan pencarum KWSP yang beragama Islam mengeluarkan simpanan mereka bagi tujuan mengerjakan ibadah haji bagi diri mereka dan keluarga terdekat sekurang-kurangnya sekali dalam seumur hidup mereka walaupun belum mencapai umur persaraan 55 tahun; selanjutnya Dewan juga mengambil ketetapan mendesak Kementerian Kewangan supaya segera mengambil langkah memansuhkan Seksyen 167 Akta Insurans dan Peraturan 6 KWSP 2001 yang banyak menimbulkan masalah dan disalahgunakan oleh penama yang dinamakan sebagai benefisiari kerana banyak kes di mana penama apabila menerima wang caruman daripada KWSP telah tidak membahagikan wang tersebut menurut syarak’ dan hukum faraid; atau sebagai alternatif mengenakan syarat kepada pengurusan KWSP supaya wang caruman si mati tidak dibayar kepada penama kecuali mereka telah mengemukakan sijil faraid daripada Mahkamah Syariah dan pembayaran dibuat oleh KWSP terus kepada waris-waris yang dinamakan di dalam sijil faraid yang dikeluarkan oleh Mahkamah Syariah yang berbidang kuasa tersebut ”.

(Menteri Kewangan)

53. PR-1223-U33986

Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Kementerian Pertahanan supaya mewujudkan kem-kem Program Latihan Khidmat Negara (PLKN) yang mengambil hanya pelatih wanita sahaja sebagai pilihan bagi mereka dan ibu bapa yang mahukan anak perempuan mereka diasingkan kerana terlalu banyak aduan pelatih-pelatih wanita yang melalui pengalaman diganggu oleh sama ada pelatih atau petugas lelaki sehingga ada yang ke peringkat mencabul, mendera dan merogol; ramai ibu bapa yang mengadu anak perempuan mereka yang apabila kembali daripada PLKN berubah menjadi terlalu terbuka dalam pergaulan dan perhubungan dengan lelaki walaupun sebelum ke PLKN anak-anak mereka sangatlah bersopan dan menjaga akhlak dan batasan pergaulan dengan lelaki, Selanjutnya Dewan mengambil ketetapan mendesak Kementerian Pertahanan supaya menerapkan dalam syllabus latihan kepada pelatih-pelatih beragama Islam modul nilai Islam seperti mewajibkan solat jemaah pada tiap waktu solat fardu, qiamullail dan tahajud dan melatih mereka supaya mengimarahkan masjid berhampiran kem PLKN yang mana ini akan bukan sahaja menjalinkan ukhawah dan persaudaraan dengan masyarakat sekeliling, ianya juga akan memperkukuhkan dan memperkuat aspek spiritual dan kerohanian pelatih-pelatih PLKN ”.

(Menteri Pertahanan)

54. PR-1223-U33987
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mencadangkan kepada Menteri Pengangkutan supaya diadakan koc-koc dan gerabak-gerabak khas di perkhidmatan Kereta api Tanah Melayu (termasuk komuter, perkhidmatan antara bandar) dan Sistem Transit Aliran Ringan (STAR dan Putra) bagi “Wanita Sahaja” ini adalah untuk memberi pilihan kepada penumpang wanita membuat pilihan untuk menaiki koc dan gerabak khas untuk wanita sahaja termasuk bagi koc berkatil kerana banyak aduan diterima di mana penumpang wanita di perkhidmatan KTMB dan LRT mengadu mereka diraba, dicabul dan diganggu dengan gangguan seksual semasa menggunakan perkhidmatan ini terutama di waktu puncak. Oleh itu untuk keselesaan dan keselamatan penumpang wanita, Dewan mencadangkan kepada Kementerian Pengangkutan supaya segera mengkaji dengan tujuan melaksanakan skim koc dan gerabak “Khas Untuk Wanita Sahaja” bagi perkhidmatan Kereta api Tanah Melayu (termasuk komuter , perkhidmatan antara bandar) dan Sistem Transit Aliran Ringan (STAR dan Putra) ”.

(Menteri Pengangkutan)

55. PR-1223-U33989
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mencadangkan kepada Kementerian Dalam Negeri, dengan kerjasama Jabatan Perdana Menteri (Bahagian Hal Ehwal Islam) supaya mengkaji kepada keperluan mewujudkan sebuah pusat tahanan, penjara dan/atau tempat pelaksanaan hukuman bagi mereka yang disabit dan dijatuhkan hukuman oleh mana-mana Mahkamah Syariah yang berbidang kuasa memandangkan tiadanya pusat tahanan, penjara dan/atau tempat pelaksanaan hukuman bagi pesalah-pesalah syarie seperti yang kita persaksikan dalam kes Kartika Sari Dewi Sukarno baru-baru ini. Dewan mengambil perhatian bahawa pelaksanaan hukuman bagi pesalah syarie adalah sangat berbeza dari tujuan, matlamat dan bentuk hukuman bagi pesalah syarie berbanding dengan pesalah di Mahkamah Sivil; selanjutnya”.

Dewan mengambil ketetapan mengecam dan mengutuk mereka yang mempertikai dan memperlekehkan hukuman rotan yang telah dijatuhkan oleh Mahkamah Tinggi Syariah Kuantan ke atas Kartika Sari Dewi Syukarno pada 20.07.2009 termasuk Majlis Peguam Malaysia, Sis Forum Malaysia Sdn. Bhd., Tun Dr. Mahathir Mohamad dan lain-lain individu dan NGO kerana hukuman yang dijatuhkan oleh Mahkamah Tinggi Syariah Kuantan itu adalah sah dan menurut peruntukkan Perlembagaan Persekutuan khususnya Artikel 74 dan Jadual 9 Senarai II dan juga menurut Enakmen Prosedur Jenayah Syariah dan oleh itu sebarang tindakan mempertikaikan hukuman tersebut serta perlaksanaannya dengan melabelnya sebagai “tidak berperikemanusiaan, zalim, tidak bertamadun dan barbaric” adalah merupakan suatu penghinaan terhadap keputusan Mahkamah Tinggi Syariah Kuantan tersebut dan tindakan tegas dan keras termasuk siasatan dan pendakwaan menurut Seksyen 298A Kanun Keseksaan atau mana-mana lain undang-undang yang ada hendaklah segera diambil”.

(Menteri Dalam Negeri)

56. PR-1223-U33990
Tuan Zulkifli bin Noordin [Kulim Bandar Baru] akan mencadangkan:-

“Bahawa Dewan ini mengambil ketetapan mendesak Menteri di Jabatan Perdana Menteri (Bahagian Hal Ehwal Islam) supaya mengarahkan Pendakwa Raya Syarie, Jabatan Agama Islam Wilayah Persekutuan Kuala Lumpur supaya menyegerakan perbicaraan dan pendakwaan kes aduan qazaf yang dibuat oleh Dato’ Seri Anwar Ibrahim terhadap Mohd. Saiful Bukhari yang telah lama tergantung tanpa sebarang tindakan memandangkan Mahkamah Tinggi Syariah Wilayah Persekutuan telah bersedia pada bila-bila masa untuk membicarakan kes tersebut”.

(Perdana Menteri)

57. PR-1223-U33401
Dr. Ramasamy a/l Palanisamy [Batu Kawan] akan mencadangkan:-

"Bahawa Dewan ini meminta Kerajaan Malaysia untuk menubuhkan sebuah Suruhanjaya Di-Raja untuk menyiasat masalah-masalah yang dihadapi oleh kaum peribumi Penan di Sarawak di mana sejak kebelakangan ini wujudnya dakwaan bahawa wanita-wanita serta gadis-gadis bawah umur dari kaum ini menjadi mangsa perogolan dan jenayah seks yang dilakukan oleh pekerja-pekerja industri pembalakan”.

(Perdana Menteri)

58. PR-1223-U33415
Dr. Ramasamy a/l Palanisamy [Batu Kawan] akan mencadangkan:-

"Bahawa Dewan ini meminta Kementerian Pengajian Tinggi untuk sentiasa memantau dan mengadakan siasatan terhadap masalah plagiat (plagiarism) yang semakin berleluasa di kalangan ahli-ahli akademik di Institusi Pengajian Tinggi Awam dan juga swasta memandangkan masalah ini menjadi satu jenayah akademik yang serius dan tidak beretika".

(Menteri Pengajian Tinggi)

59. PR-1223-U33420
Dr. Ramasamy a/l Palanisamy [Batu Kawan] akan mencadangkan:-

"Bahawa Dewan ini meminta Kementerian Perumahan dan Kerajaan Tempatan untuk mengimplementasikan peraturan-peraturan yang efektif demi memastikan bayaran penyelenggaraan bagi projek-projek perumahan terutamanya projek-projek rumah kos rendah adalah dikutip tanpa sebarang halangan dan bayaran penyelenggaraan ini digunakan secara efisien untuk penduduk-penduduk di projek-projek tersebut".

(Menteri Perumahan dan Kerajaan Tempatan)

60. PR-1223-U34072
Tuan Jeff Ooi Chuan Aun [Jelutong] akan mencadangkan:-

"Bahawa Dewan ini mengambil maklum bahawa satu petugas khas harus diwujudkan segera untuk menyelaraskan pelbagai usaha dalam bidang Kajian Perubahan Iklim dan Pemanasan Global, serta bidang penerapan teknologi hijau dalam perniagaan hijau (green business) yang sedang dijalankan di berbagai-bagai Kementerian, Jabatan dan Cendekiawan di institusi-institusi pengajian tinggi tempatan agar Malaysia dapat menandingi inisiatif-inisiatif seumpamanya yang sedang berlangsung pada peringkat antarabangsa".

(Menteri Sumber Asli dan Alam Sekitar)

61. PR-1223-U34075

Tuan Jeff Ooi Chuan Aun [Jelutong] akan mencadangkan:-

"Bahawa Dewan ini mengambil maklum bahawa laporan mengenai gadis-gadis sunti keturunan Penan di kawasan Baram, Sarawak, yang terdedah kepada ancaman rogol, pencabulan kehormatan dan seksaan seksual oleh pengusaha-pengusaha kayu balak harus diberi prihatin dengan kadar segera, termasuk jaminan pihak berkuasa supaya keselamatan mereka tetap terpelihara dan mereka yang melakukan perbuatan jenayah terhadap penduduk-penduduk muda Penan ini wajib dikenakan hukuman yang setimpal".

(Menteri Dalam Negeri)

62. PR-1223-U34985

Tuan Gwo-Burne Loh [Kelana Jaya] akan mencadangkan:-

"Bahawa Dewan ini menubuhkan sebuah Suruhanjaya Diraja Siasatan Kes Pembunuhan Altantuya Sharibuu yang mati dibunuh beberapa tahun lalu. Daripada siasatan dan perbicaraan yang dijalankan, banyak pihak tidak berpuas hati dengan perjalanannya dan diharap agar Suruhanjaya ini mampu menjawab pelbagai spekulasi".

(Perdana Menteri)

63. PR-1223-U34986

Tuan Gwo-Burne Loh [Kelana Jaya] akan mencadangkan:-

" Bahawa Dewan ini mengkaji semula undang-undang yang berhubung dengan pengangkutan jalan raya dan menumpukan kepada penguatkuasaan undang-undang jalan raya berbanding dengan anggota polis trafik memandangkan terlalu banyak kesalahan undang-undang dilakukan disebabkan kekurangan penguatkuasaan".

(Menteri Pengangkutan)

64. PR-1223-U34988

Tuan Gwo-Burne Loh [Kelana Jaya] akan mencadangkan:-

" Bahawa Dewan ini mengambil maklum bahawa Kerajaan Malaysia sebagai anggota Majlis Hak Asasi Manusia Bangsa-bangsa Bersatu dalam menguatkuasakan Resolusi 62/149 Bangsa-Bangsa Bersatu mengenai Moratorium terhadap Hukuman Mati yang telah dikuatkuasakan oleh Perhimpunan Agung Bangsa-Bangsa Bersatu pada 18 Disember 2007 di mana negara-negara yang masih mengamalkan hukuman mati diminta untuk menghentikan penggunaan hukuman mati dan mengurangkan jumlah hukuman yang membawa hukuman mati secara berperingkat dan melaksanakan moratorium terhadap ke semua hukuman-hukuman mati dengan hasrat untuk menghapuskan hukuman ini sama sekali. Maka dengan ini Dewan hendaklah mengambil ketetapan untuk meminta Kerajaan melalui Kementerian Luar untuk membantu mematuhi Moratorium tersebut dan meminda undang-undang yang bercanggah dengan Moratorium tersebut".

(Menteri Luar Negeri)

65. PR-1223-U34468

Dato' Haji Mahfuz bin Omar [Pokok Sena] akan mencadangkan:-

"Bahawa Dewan ini mendesak Kerajaan menghentikan siasatan kebocoran kertas Kabinet berkaitan isu PKFZ dan mengisytiharkan dokumen tersebut bukan lagi di bawah OSA memandangkan isi dokumen tersebut bukannya mengandungi isu keselamatan dan pertahanan negara sebaliknya ia menyentuh isu penyalahgunaan kuasa-kuasa Kabinet yang menyebabkan berlakunya skandal PKFZ. Jika Kerajaan mengamalkan prinsip integriti yang tinggi,rakyat sewajarnya diberi peluang untuk mengetahui dan memiliki secara bebas dokumen tersebut".

(Menteri Dalam Negeri)

66. PR-1223-U34502

Dato' Haji Mahfuz bin Omar [Pokok Sena] akan mencadangkan:-

"Bahawa dewan ini mewakili rakyat Malaysia merakamkan kekesalan yang amat sangat atas keengganan Kerajaan menubuhkan Suruhanjaya Diraja bagi menyiasat skandal PKFZ sebaliknya Kerajaan dilihat cuba untuk menutup skandal ini dan melindungi pemimpin politik UMNO/BN. Sekali lagi Kerajaan dituntut demi kepentingan negara dan rakyat perlu segera menubuhkan Suruhanjaya Diraja yang bebas untuk menyiasat secara keseluruhan skandal PKFZ yang merupakan skandal terburuk negara yang menelan wang rakyat bernilai RM12 bilion".

(Perdana Menteri)